

Atuartut meeqqat atuarfianniit soraarummeertartut ilinniaqqinnissamut piareersimalluarnerunissaat aammalu meeqqat atuarfiat pitsanngorsarniarlugu atuarfitsialammi naliliigallarnermi atuarfik pillugu Inatsisartut peqqussutaat nr. 8, 21 maj 2002-meersumit tikkuussissutigineqartunut UPA 2012-ip tungaanut Naalakkersuisut malinnaanissamut peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasortaq Knud Fleischer, Kattusseqatigiit Partiiat)

Akissuteqaat

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

Siullermeerinnineq

Atuartut meeqqat atuarfianniit soraarummeertartut ilinniaqqinnissamut piareersimalluarnerunissaat aammalu meeqqat atuarfiat pitsanngorsarniarlugu atuarfitsialammi naliliigallarnermi atuarfik pillugu Inatsisartut peqqussutaat nr. 8, 21 maj 2002-meersumit tikkuussissutigineqartunut UPA 2012-ip tungaanut Naalakkersuisut malinnaanissamut peqquneqarnissaannik Inatsisartut aalajangiiffigisassaattut siunnersuummut Naalakkersuisut qujapput.

Atuarfik pillugu peqqussut maanna atuuttoq 2003-mi atuutilerpoq. Peqqussummi tunngavigineqartut naapertorlugit atuartut atuartitsinermik ukiuni qulini tamarmiusuni atuarsimasut siulliit 2013-imi atuarunnaassapput. Peqqussutip tassanilu tunngaviusut qanoq sunniuteqarsimanersut taamanikkut aatsaat naliliivigineqavissinnaalissapput. Taamaattorli ukiut suli amerlanerusut qaangiuppata aatsaat tamanna pisinnaavoq, perorsaanikkut ineriartortitsiniarnerit arlalippassuit nunatsinni atuarfinni aatsaat ingerlanneqaleruttormata.

Taamaattorli piffissap qiteqqunnerani 2010-mi atuarfimmik naliliinerup inernerini paasinarsivoq peqqussut nunatsinni atuarfinni tamakkiisumik suli piviusunngortinneqarsimanngitsoq. Pingaartumik illoqarfinni atuarfinni nunaqarfinnilu atuarfinni minnerusuni piviusunngortitsiniarnermi kinguaattooqqasoqarpoq.

Ilinniartitaanermut Naalakkersuisoqarfik Inerisaavimmik suleqateqarluni atuartunut 2010-mi atuarunnaartunut ilisarnaasiorsimavoq. Atuartut fagini ataasiakkaani assersuutigalugu danskisut, tuluttut matematikimilu angusaat kisiisa misissoraanni atuartut pisinnaasaat tamakkerlugit takuneqarsinnaanngillat. Akerlianik atuartut fagit saniatigut suliatigut piginnaasaat misissoraanni atuarfimmi angusat pitsaanerupput.

Atuartut 10 %-iisa missaat suliatigut sanngiitsorujussuartut isigineqartariaqarput. Taakku ima sanngiitsigaat aamma Meeqqanut Inuusuttunullu Periussisami maanna Namminersorlutik Oqartussani suliarineqartumi sammisassatut isigineqartariaqarlutik. Akerlianik atuartut nukittuffilerujussuit 22 %-it missaanniipput.

Akornanniittut atuartut pitsaasunit pitsaanerpaat 20 %-it missaanniipput pitsaasuniillu pitsaannginnerpaat 48 %-it missaanniillutik. Pineqartut kingulliit tassaanerupput atuartut suliatigut pisinnaanikinnerusut, pingaartumik oqaatsitigut.

Inuusuttut ilinniaqqinnissaannut tunngatillugu atuaqatigiit 42 %-iisa missaat ilinniakkamik aallartitaqarsimapput. Pingaartumik atuartut nukittuffillit pitsaasuniillu pitsaanerpaat ilinnialersarput.

Ilinniartitaanermut pilersaarutip siuariartornera ingerlaannassappat pingaartumik pisinnaanikinnerusut pitsaasuniillu pitsaannginnerpaat tapersorsorneqassapput. Taakku oqaatsitigut sanngiitsuupput siunissamilu atuartut taakku tapersorsorneqarnissaat sammineqassaaq.

Atuarfik Nunap Immikkoortuini ineriartortitsinissamut periusissami suliniarfiuvoq. Taamaattumik piffissap qiteqqunnerani naliliinermit kaammattuutigineqartut, kiisalu kommunit makku aallaavigalugit pisariaqartitaat suliniarfiilu aallaavigalugit atuarfik pillugu peqqussutip pivusunnngortinneqarnissaata malinnaavigineqarnissaa nukittorsarneqarnissaalu pillugit Inerisaavik KANUKOKA-mik suleqateqarluni upernaq manna kommuninik sisamanik taakkuninnga isumaqatigiissuteqarpoq:

- Atuarfimmik tamatuminngalu malinnaanermut pilersaarutissatut naatsorsuutigineqartunik naliliineq
- Inuusuttunut atuarunnaartunut tunngatillugu taakku ingerlanerannik misissueqqissaarneq
- Atuarfiup inuusuttullu ilinniarfiisa akornanni ilitersuineq aqutissiuussinerlu
- Atuartut immikkut pisariaqartitsisut
- Nunaqarfimmit illoqarfimmut – ilinniartut ineqarfiannut atuartut angerlarsimaffiannut ikaarsaariarneq
- Ilinniartitsisunik angalasoqartarnermik aaqqissuussineq ungasianiillu atuartitsineq
- Inuit nukissallit
- Nukissanik atuineq
- Kommunit atuartitsinermit tunngavigisanik sunniuteqarluartunik pivusunnngortitsiniarnerannik malinnaaneq

Piffissap qiteqqunnerani naliliinerup toqqaannartumik kingunerisaanik Naalackersuisut KANUKOKA-mik Inerisaavimmillu suleqateqarlutik pingaarnertut sammineqartuni makkunani atuarfik pillugu peqqussutip iluarsaaneqarnissaanik pilersarusiorneq aallarereerpaat:

- Suliaqarfiup najukkami toqqagassat fagit suliaqarfiillu allat assigalugit suliaqarfittut qitiusumik aalajangersakkatut allannngortinneqarnissaa,
- Nunaqarfinni atuarfinnut tiimissatut ikinnerpaaffiliussanik iluarsineq,
- Atuarfimmi siulersuisut piginnaatitaaffii suliaassaalu,
- Ilinniartitsisut pikkorissarneqartarnissaanik ilinniarteqqinneqartarnissaannillu qularnaarinq, kiisalu
- Nalunaarutinik, taakkununnga ilanngullugit trininut siunertat, faginut siunertat ilikkagassatullu siunertat pillugit nalunaarummik naleqqussaaneq.

Aammattaaq oqaatigineqartariaqarpoq Naalackersuisut KANUKOKA-mik suleqateqarlutik suleqatigiissitanik nunaqarfiup illoqarfiullu akornanni ikaarsaariarnerup atuartup atuaqqinnissaanut naleqqunnerpaamik pinissaata qularnaarneqarnissaanut kaammattuuteqartussanik pilersitsimmata.

Taamaattumik siunnersuutigineqartoq Naalackersuisut tapersorsorpaat tunngaviatigulli isumaqarlutik atuarfik pillugu peqqussummik allannguinikkuinnaq atuartut angusaat allannngortinneqarsinnaanaviannngitsut. Ilinniartitaanermut pilersaarummi siunertaasut kinguneqassappata ilinniartitaanernik aaqqissuussinerit tamarmik sulinertut ataqatigiissutut ingerlaavartutullu isigineqartariaqarput, tassani pilersarusiorneq, atuartitsineq naliliinerlu, kiisalu

ajornartorsiutaasunut tunngatillugu suliniarneq sulinerullutik ilinniarfitsinni tamani malinneqartussat.

Tamatuma saniatigut Naalackersuisut isumaqarput inuusuttavut amerlanerusut atuartitaanikkut ilinniartitaanikkullu ingerlassappata ilikkariartortarnermut inunnullu isiginninneq allannngortinneqartariaqartoq: Inuit tamarluinnarmik piginnaaneqarnerat, eqqortumik tapersersuinikkut atuartitsinikkullu ilinniarsinnaasut upperisariaqarlugulu upperissavarput. Tamatumunnga ilinniarfiit ilinniartut qitiutillugit ilinniartitsisariaqarput, tassani ilinniartut ilikkagaqarniarnikkut pisinnaasaat pisariaqartitaallu atuartitsinermik pilersaarusiornermi tunngaviussallutik.

Naalackersuisut taamatut oqaaseqarlutik siunnersuutip akuerineqarnissaa inassutigaa.